

續資治通鑑

冊十

續資治通鑑卷第三十三

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

宋紀三十三

起柔兆執徐七月盡疆圉大荒落十二月凡一年有奇

真宗膺符稽古神功讓德文明武定章聖元孝

皇帝

大中祥符九年

遼開泰五年

秋七月甲辰遼主獵於赤山

以敦睦宮太保陳昭袞兼掌圍場事遼主射虎以馬

馳太驟矢不及發虎怒奮勢將犯蹕左右辟易昭袞

舍馬捉虎兩耳騎之馬駭且逸遼主命衛士追殺昭

袞大呼止之虎雖軼山昭袞終不墮地伺便拔佩刀

殺之輦至遼主前慰勞良久即日設燕悉以席上金

銀器賜之加節鉞遷圍場都太師賜國姓命張儉呂

德懋賦以美之

辛亥飛蝗過京城帝詣玉清昭應

宮開寶寺靈隱塔焚香祈禱禁宮城音樂五日先是
帝出死蝗以示大臣曰朕遣人徧於郊野視蝗多自
死者翼日執政有袖死蝗以進者曰蝗實死矣請示
於朝率百官賀王旦曰蝗出爲災災弭幸也又何賀
焉衆力請旦固稱不可乃止於是二府方奏事飛蝗
蔽天有墮於殿廷間者帝顧謂旦曰使百官方賀而
蝗若此豈不爲天下笑邪 甲寅詔前降德音賜酺
宜俟來春 乙卯分命內臣與轉運使諸州通判職
官案視蝗傷苗稼仍許卽時改種悉除其租申禁宮
城音樂十日 癸亥上封者言蝗旱由大臣子弟恣
橫所致詔曰近以蝗蝻傷於苗稼攷前書之所記由
部吏之侵漁屬者郡縣之官冒法不檢子弟之輩怙

勢肆求民實怨嗟氣用堙鬱俛從輕典恐長弊風自
今士大夫各務敦修更思教勸姑念保家之美勿貽
敗類之羞苟撥顯尤難從末減仍令所在官司謹察
視之 甲子詔禁京城音樂盡此月 丙寅詔自今

羣官職田並須遵守元制無得侵擾客戶遇災沴卽
蠲省之先是殿中侍御史王奇請籍納職田以助賑
貸帝曰朕以此田均濟官吏本欲人各足用責其清
謹耳奇未曉給田之理然朕每覽法寺奏款在外官
屬所占職田多踰往制不能自備牛種或水旱之際
又不蠲省致民無告遂罷奇奏降詔申敕焉 八月

丙子令江淮發運使歲留上供米五十萬以備饑年
賑濟 遼主如懷州有事於諸陵戊寅還上京 己

卯中使張文昱等言分路檢視蝗傷民田約十之一

二帝命所定蠲稅分數更加優厚

丙戌帝親製玉

皇聖號冊文召輔臣同觀自禁中具儀仗迎導赴大安殿摹寫刻玉

樞密使同平章事陳堯叟罷爲右

僕射堯叟以久疾求領外任從之尋命判河陽月給

實俸歲賜公使錢百萬堯叟入辭別資錢二百萬又

作詩餞其行堯叟奏對明辨久典機密軍馬之籍悉

能周記云丁亥以向敏中使回宴近臣於長春殿

不舉樂閔雨也壬辰羣臣請受尊號冊寶表五上

從之九月癸卯遼主弟秦晉國王隆慶朝遼主于

上京遼主親出迎勞至實德山因同獵於松山未幾

封隆慶長子札拉

舊作查
刺今改

爲中山郡王次子遂格

舊作

遂哥
今改爲樂安郡王

甲辰兵部尙書參知政事丁謂

罷爲平江節度使謂上章請外任卽授本鎮旄鉞以

寵其行尋命謂知昇州謂請歸拜墓許之 丙午以翰林學士陳彭年爲刑部侍郎王曾爲左諫議大夫權御史中丞張知白爲給事中並參知政事樞密直學士任中正爲工部侍郎樞密副使曾知白彭年等與王旦同在中書嘗乘閒謂旦曰曾等拔擢至此公力也願有所裨補旦曰願聞之曾曰每見奏事其間有不經上覽者公批旨行下恐人言之以爲不可旦遜謝而已一日曾等以前說聞於帝帝曰所行公否皆曰公帝曰王旦事朕多歷年所朕察之無毫髮私自東封後朕諭以小事專行卿等當謹奉之曾等退謝於旦曰上之委遇非曾等所知也旦曰向蒙諭及不可自言先得上旨今後更賴諸公規益略不介意右諫議大夫凌策自成都代還帝將擢任之謂王

旦曰策有才用治蜀敏而能斷旦曰策性質淳和臨
洩彊濟帝曰然於是命爲給事中權御史中丞丁
未曹瑋言嘉勒斯賚宗哥等率蕃部兵三萬餘人寇
至伏羌寨三都谷卽領軍擊敗之逐北二十餘里斬
首千餘級生擒七人官軍被傷者百六十人陳歿者
六七十人詔賜瑋及駐泊鈐轄高繼忠都監王懷信
錦袍金帶器幣將校立功者第遷一資仍賜金帛陳
歿者卹其家先是翰林學士李迪召對龍圖閣命草
詔書徐謂迪曰曹瑋在秦州屢請益兵未及遣遽辭
州事誰可代瑋者對曰瑋知嘉勒斯賚欲入寇且窺
關中故請益兵爲備非怯也且瑋有謀略諸將皆非
其比何可代陛下重發兵豈非將上玉皇聖號惡兵
出宜秋門邪今關右兵多可分以赴瑋帝因問關右

幾何對曰臣向在陝西以方寸小冊書兵糧數備調
發今猶置佩囊中帝令自探取目內侍取紙筆具疏
某處當留兵若干餘悉赴塞下帝顧曰真所謂頗牧
在禁中未幾嘉勒斯賚果犯邊秦州方出兵復召問
曰瑋戰克乎對曰必克及瑋捷書至帝謂迪曰卿何
料之審也迪曰嘉勒斯賚大舉入寇使諜者聲言以
某日下秦州會食以激怒瑋瑋勒兵不動坐待其至
是則以逸待勞臣用此知其決勝也 庚戌以不雨
罷重陽宴 甲寅令諸路轉運使督民捕蝗帝以久
旱憂形於色減膳撤樂徧走羣望及是霑沛帝作甘
雨應祈詩近臣畢和 丁巳詔諸州蝗旱今始得雨
方在勸農罷諸營造 己未詔諸州縣七月以後訴
災傷者準格例不許今歲蝗旱特聽受其牒訴 戊

辰青州言飛蝗投海死 己巳詔聞益州頻雨穀貴
令發官廩糶濟之所修玉局觀上清宮悉罷 詔災
傷州軍有以私廩賑貧民者二千石與攝助教三千
石與大郡助教五千石至八千石第授本州文學司
馬長史別駕 庚午內出北面榆柳圖示輔臣數踰
三百萬帝曰此可代鹿角也雄州李允則頗用心於
此朕嘗詢其累任勞課書歷否對曰設官本要涖事
但當竭力何得更謀課最此言亦可嘉也 先是京
畿京東西河北路蝗生彌覆郊野七月過京師延至
江淮及霜寒始盡飛蝗之過京城也帝方坐便殿左
右以告帝起臨軒仰視則蝗勢連雲障日莫見其際
帝默然還坐意甚不懌乃命撤膳自是體遂不豫
冬十月壬申朔詔以來年正月二日詣景靈宮奉上

聖祖徽號禮儀院言正月天書降用上元日朝拜玉清昭應宮十月聖祖降請以下元日朝拜景靈宮著爲定式 己卯王欽若表上翊聖保德真君傳三卷帝製序 初祠部員外郎呂夷簡提點兩浙路刑獄時京師大建宮觀伐材木於南方有司責期令峻急工徒至有死者誣以亡命收繫妻子夷簡疏請緩役從之又言盛冬挽運艱難宜須河流漸通以兵卒番送及代歸帝曰卿所奏有爲國愛民之心擢刑部員外郎兼侍御史知雜事歲蝗旱夷簡請責躬修政嚴飭輔相思所以恭順天意及奏彈李溥專利罔上寇準判永興黥有罪者徙湖南道由京師上準變事夷簡曰準治下急是欲中傷準耳宜勿問益徙之遠方帝從之 先是丁謂力庇李溥主行新法言不便者

雖衆謂持之益堅及謂罷政羣議復起帝謂王旦等
曰茶鹽之利要使國用贍足民心和悅卿等宜熟思
之旦等曰此屬邦計欲選官與三司再行定奪臣等
參詳可否奏裁帝曰卿等宜卽具詔明述恤民之意
丁酉遂下詔言茶鹽等亦依常例更不別生名目致
有疑誤虧損 十一月辛丑朔遼以參知政事馬保
忠同知樞密院事監修國史 甲辰三司言諸司欠
商賈飛錢欲罷來年官市繒絹償之詔發內藏錢二
十萬緡以給其費 河西節度使知壽州石普上言
九月下旬日食者三又言商賈自秦州來言嘉勒斯
賚欲陰報曹瑋請以臣嘗所獻陳圖付瑋可使必勝
先是帝方崇符瑞而普請罷天下醺設歲可省緡錢
七十餘萬以贍國用遂忤帝意於是帝益怪普言踰

分而樞密使王欽若因言普欲以邊事動朝廷帝怒
欲遣使就劾宰相王旦請先召還命知雜御史呂夷
簡推鞫獄具集百官參驗九月下旬日不食普坐私
藏天文罪應死詔除名配賀州遣使繫赴流所帝謂
輔臣曰普出微賤性輕躁干求不已旣憐文藝而假
手撰述以揣摩時事朕以先朝故每容忍之而普言
益肆錄其微效俾貸極典聞普在流所思幼子輒泣
下流人有例攜家否王旦等曰律無禁止之文詔許
挈族以行尋命房州安置增屯兵百人守護之普偶
儻有膽略凡預計伐聞敵所在卽馳赴之兩平蜀盜
大小數十戰摧鋒與賊角衆伏其勇 壬子以知秦
州曹瑋爲秦州都部署依前兼涇原儀渭州鎮戎軍
緣邊安撫使以禮部郎中李及爲太常少卿知秦州

時瑋數上章求解州事帝問王旦誰當代瑋者旦薦
及可任帝卽命之衆議皆謂及非守邊才祕書監楊
億以告旦旦不荅及至秦州將吏亦心輕之會有屯
駐禁軍白晝掣婦人金釵於市中吏執以聞及方坐
觀書召之使前略加詰問其人服罪及不復下吏亟
命斬之復觀書如故將吏皆驚服不日聲譽達京師
億見旦具道其知人之明旦笑曰禁軍戍邊白晝爲
盜於市此固當斬烏足爲異旦之用及者其意非在
此也夫以曹瑋知秦州戎羌讐服邊境之事瑋處之
已盡其宜使它人往必矜其聰明多所變置敗壞瑋
之成績旦所以用及者但以及厚重必能謹守瑋之
規而已 遼秦晉國王隆慶自上京還至北安浴於
溫泉得疾十二月乙酉卒遼主哀慟輟朝追贈皇太

第

一政異

聖宗弟隆慶隆祐並膺委任以恩禮終長編乃云使臣自

雄州入奏言權場商旅貿易於北境契丹主第曰隆慶者受饋遺必還其直又設酒食犒勞之孫僅言國主氣濁而體肥隆慶瘦而剛果國人多歸之又云宋博使契丹還言國主奉佛其弟泰王隆慶尚武吳王隆祐慕道又云契丹主闇弱自蕭太后與韓德讓相繼死其弟隆慶尤桀黠衆心附之言事者請因遣使特加恩隆慶帝曰柔遠之道務存大體正當講信修睦使之和協如其不法豈宜更加禮邪此皆敵國詆毀之詞或係傳聞之誤殊非事實今不取

乙

卯詔改來年元曰天禧

戊戌奉天書置天安殿王

皇寶冊袞服二聖絳紗袍於文德殿己亥奉天書及

玉皇寶冊袞服赴玉清昭應宮聖祖寶冊仙衣赴景

靈宮

是歲遼放進士孫傑等四十八人

天禧元年

遼開泰六年

春正月辛丑朔改元奉天書升太

初殿行薦獻禮上玉清皇大帝寶冊袞服又詣二

聖殿奉上絳紗袍奉幣進酒諸路分設羅天大醮壬

寅奉上聖祖寶冊仙衣於天興殿禮畢車駕還內羣

臣入賀於崇德殿

丙午詔以是月十五日行宣讀

天書之禮

庚戌親饗六室辛亥奉天書合祭天地

以太祖太宗並配還御正陽門大赦天下賞賜如東
封例免災傷州軍見欠田租及和糴減荆湖南路鹽
價蠲天下逋欠雖盜用經三十年者亦蠲之遂御天
安殿受尊號寶冊 乙卯帝與羣臣讀天書於天安
殿 壬戌詔以四月一日爲天祺節其制度悉如天
貺 丙寅命宰相王旦爲兗州太極觀奉上册寶使
己巳給事中孫僅卒帝曰僅駕於儒學性端慤中
立無競深可惜也命遷其子官 是月遼主如錐子
河 二月庚午朔詔賑災發州郡常平倉 辛未三
司假內藏庫錢五十萬貫 壬申御正陽門觀酺凡
五日 甲戌遼駙馬蕭託雲舊作圖玉今改削同平章事以
公主殺無罪婢託雲不能齊家也公主降爲縣主改異

蕭託雲傳金鄉公主殺家婢降封郡主本紀作縣主紀傳互異據公主表云聖宗第十三女封金鄉郡主進封公主以殺奴婢得罪薨于縣主者是也今從本紀

丁丑詔別置諫官御史各六

員增其月俸不兼它職每月須一員奏事或有急務聽非時入對及三年則黜其不勝任者戊寅內外官並加恩發常平倉粟出糶以濟貧民京師物貴故也丁亥設元天大聖后版位於文德殿帝親酌獻拜授冊寶於王旦仙衣於趙安仁旦等跪奉以升輅具鹵簿儀衛所過禁屠宰二日官吏迎拜至兗州遣官三十員袴褶前導奉冊日帝不視朝庚寅進封李公蘊爲南平郡王辛卯召太子中允直龍圖閣馮元講易於宣和門之北閣待制查道李虛己李行簡預焉自是聽政之暇率以爲常帝因數訪大臣能否行簡無所怨昵必稱道其長人推其長者初

有日者上書言宮禁事坐誅籍其家得朝士所與往還占問吉凶簡尺帝怒欲盡付御史案罪王旦具請以歸翼日白帝曰此人之常情且語不及朝廷不足究治因自取舊所占問者進曰臣少賤時不免爲此必以爲罪願并臣下獄帝曰此事已發何可免旦曰臣爲宰相執國法豈可自爲之幸於不發而以罪人帝意解旦至中書悉焚所得書旣而大臣有欲因是以擠己所不快者力請究治帝令就旦取書旦曰臣已焚之矣由是獲免者衆 己亥刑部侍郎參知政事陳彭年卒帝聞之卽幸其第涕泗良久贈右僕射謚文僖錄其子孫甥姪彭年敏給彊記尤好儀制沿革刑名之學自升內閣卽以翰墨爲己任及李宗諤卒楊億病退彭年專其任事務益緜愈勤職以固寵